

INUIT ATAQATIGIIT INATSIARTUNI



UPA2023/160
18 april 2023
Adam Kristensen

Qanoq iliornikkut puiserpassuit pisarineqartartut amiiginnariarlugit ilivitsuutillugit imaanut eqqaannarneqartartut pinaveersaartissinnaaneri pillugu apeqquteqaat aallaavigalugu oqallisissiasatut siunnersuut.

(Inatsisartunut ilaasortaq Siverth K. Heilmann, Atassut)

Oqaaseqaat:

Qanga naggueqatigiit Inuit inuuniarneranni puisip neqaa pinngitsoorneqarsinnaasimangilaq, oqaluttuarisaanerput qiviaraanni takuneqarsinnaavoq puisip neqaa nerineqartartoq orsualu qaammaqqutingalugulu kiassaaticineqartartoq, qangaanerusoq puisit neqaannik eqqaanginnartoqarneq ajorpoq pisariqartitat sinnerlugit pisaqartoqarneq ajormat, ullumikkulli piniariaaseq allanngorneratigut ajoraluartumik nunatsinni annerusumik qimmeqarfiunngitsuni puisit neqaannik eqqaanginnartarneq atuuppoq, puisit neqaat ingiinnarneqatartut annikillissappata iliuusissanik nassaarniartariaqarpugut.

Puisip neqaa qimminut nerukkaatissatut tunisassiarineqarsinnaanissaa pilerinaraluaq, immaqa misissuisitsinikkut periarfissamik nassaartoqarsinnaasoq nunatta avataani suleqatissanik ujaasinikkut, nalunngilarput nunani allani qimminut nerukkaatissiornermik ingerlassisoqartoq tamakkua arlaat puisip neqaannik nerukkaatissiornermik suleqatissatut piukkunnaraluit.

Puisit neqaat nerineqartutsatut tunisassiarineqarsinnaangaluarput erlaveeriarlugit orsua atatillugu qeritiinnarlugu niuerfinnut neqileriffilinnut ingerlatinneqarsinnaalluni, taamatut niuissangaanni pisariaqarpoq piffimmi puisit neqaannik tingooraavimmik peqarnissaq tunisassiorfik akuerisaq tamannalu inuussutissanut inatsisikkut aporfilerneqarsinnaavoq.

Puisip neqaa erlavii peeriarlugit orsua atatillugu qerititaq allanngujaanneruvoq, neqileriffimmi aatteriarlugit orsua peeraanni nutaatut mamassuseqarlunilu isikkoqartarpoq, uanga oqaaseqartoq Adam Kristensen taamatut puisit neqaannik tunisassiorneq 1980-ikkunni ingerlannikuungakku misilittangaqarfingaara taamaammat ullumikkut misilinneqarsinnaavoq ilimangaara tunisaalluarsinnaasut.

INUIT ATAQATIGIIT INATSIARTUNI



Puisit neqaannik qimminut nerukkaatissatut tunisassiorneq anguniarneqassappat tamanna suleqatissamik ujaasinikkut anguniarneqarsinnaasoq, maskiinat atorlugit qimminut nerukkaatissiorneq ingerlanneqartarmat tamaattoqassappallu siunnersortinik ikiorneqarnissaq pisariaqarsinnaavoq, Inuit Ataqtigiiinni isumaqarpugut piniartunik aningaasarsiorfiusinnaasunik sapinngisarput tamaat atorlugu ujaasinerusariaqartugut.